

續資治通鑑

續資治通鑑卷第二百十四

賜進士第劉景和饒有都鄉飲北湖監盛地方移乘驛餉世襲正統嘉靖間沈編集

元紀三十二

起疆圍倫靈七月盡著雍
掩茂十二月凡一年有奇

順帝

至正十七年秋七月丙子吳徐達率兵攻常熟張士德出挑戰先鋒趙德勝麾兵而進擒士德送建康遂循望亭甘露無錫諸寨皆下之士德驍鷲有謀士誠陷諸郡士德力居多及是被擒士誠爲之喪氣 己卯御史大夫特哩特穆爾奏續輯風憲宏綱 庚辰吳國公遣兵取徽州路元帥胡大海等旣克績溪遂進兵攻徽州守

將元帥巴斯爾布哈及建德路萬戶吳訥等拒戰大海
擊敗之拔其城訥與守臣阿魯輝李克膺等退守遂安
大海引兵追及于白際嶺復擊敗之訥自殺屬縣次第
皆下 戊子以李稷爲御史中丞 己丑義兵黃軍萬
戶田豐叛入紅軍陷濟寧路分省右丞實勒們遁義兵
萬戶孟本周攻之豐敗走本周還守濟寧 甲午監察
御史達爾默色劉傑言疆域日蹙兵律不嚴陝西汧梁
淮潁山東之寇有窺伺燕趙之志宜俯詢大臣共圖克
復豫定守備之策不報 丙申吳元帥胡大海進攻婺
源江浙參政楊鄂勒哲率兵十萬欲復徽州大海還師

與戰于城下大敗之殺其鎮撫呂才鄧勒哲遁去是

月立四方獻言詳定使司歸德府知府林茂萬戶時

公權叛以城降于賊歸德及曹州俱陷八月癸丑劉

福通兵陷大名路遂自曹濮陷衛輝路博囉特穆爾

李羅帖木兒今改與萬戶方扎克托出兵擊之是月帝至自

上都張士德至建康吳國公以禮待之供珍膳俟其

降士德不食不語其母痛之令士誠歲餽建康糧十萬

石布一萬匹永爲盟信吳國公不許士德以身繫事無

所成間遺士誠書俾降元以圖建康遂不食而死

後編辨證曰實錄載士德被誅而劉辰國初事蹟云不食而死今攷陳基祭文云能厲聲罵賊而不能食不義之食

則以爲不食而死
者是也今從之

張士誠使前江南行臺中丞曼濟哈

雅爲書請降於浙江丞相達實特穆爾辭多不遜楊鄂
勒哲欲納之達實特穆爾不可曰我旰在淮南嘗招安
士誠知其反覆其降不可信士誠使者往返訖無就乃
遣其僞隆平太守周仁親詣江浙省堂具陳自願休兵
息民之意鄂勒哲固勸納降乃許之士誠始要王爵達
實特穆爾不許又請爵爲三公達實特穆爾曰三公非
有司所定今我雖僞宐行事然不敢專也鄂勒哲又力
以爲請達實特穆爾雖外爲正辭然實幸其降又恐拂
鄂勒哲意遂授士誠太尉士德淮南行省平章政事士

信同知行樞密院事改隆平府復爲平江路士誠遷居
府治雖奉正朔而甲兵錢穀皆自據如故朝廷顧以招
安士誠爲達實特穆爾功詔加太尉後聞士德之死追
封楚國公而以士信爲江淮平章政事初達實特穆爾
假周伯琦行省參政招諭張士誠及是已降除伯琦同
知太常禮儀院事士誠畱之未行拜左丞士誠爲造第
宅于乘魚橋厚其廩給 九月癸酉嗣婺源州元帥汪
同與守將特穆爾布哈不協以總管王起宗黜縣萬戶
葉茂祁門元帥馬國寶降于吳甲戌江浙平章夏章等
亦降于吳 丙子以御史大夫婁都爾蘇

舊俗老的爲
沙今改

中書平章政事 丙戌吳廣興翼元帥費子賢率兵攻

武康與守將潘萬戶戰斬首百餘級遂下之 甲午澤

州陵川縣陷縣尹張輔死之 戊戌台哈布哈

舊倫太不花今

改復大名路并所屬州縣 辛丑詔中書右丞額森布

哈御史中丞成遵奉使宣撫彰德大名廣平東昌東平

曹濮等處獎勵將帥 是月命知樞密院事努都爾噶

舊倫細的該今改加太尉總諸軍守禦東昌時田豐據濟濮率

眾來寇擊走之 倪文俊謀殺其主徐壽輝不果自漢

陽奔黃州壽輝將陳友諒襲殺之友諒佐文俊攻陷諸

州郡有功遂用領兵爲元帥及文俊迎壽輝居漢陽而

專其政柄友諒心不平至是襲殺文俊併其眾自稱宣
慰使尋爲平章政事 閏月癸卯有飛星如孟青色光
燭地尾約長尺餘 監察御史多爾濟等劾奏知樞密
院事哈喇巴圖爾失陷所守郡縣詔正其罪 乙丑潞
州陷丙寅賊攻冀寧察罕特穆爾遣兵擊走之 趙晉
勝同青軍兩道攻安慶淮南行省左丞余闕拒戰月餘
賊竟敗走安慶倚小孤山爲藩蔽命義兵元帥胡巴延
統水軍戍焉冬十月壬戌陳友諒自上游直擣小孤山
巴延與戰四日夜不勝趨安慶賊追至山口鎮明日癸
亥遂薄城下闕遣兵扼于觀音橋俄饒州祝寇攻西門

余闕擊斬之其兵乃退 壬申吳中翼大元帥常遇春率廖永安等自銅陵進攻池州永安去城十里而常遇春及吳國寶率舟師抵城下合攻自辰至巳破其北門遂入其城執元帥洪某斬之擒別將魏壽徐天麟等官軍敗走薄暮復以戰船數百艘來逆戰復大敗之遂克池州 甲申吳國公閱軍于大通江遂命元帥繆大亨率兵攻揚州路克之青軍元帥張明鑑以其眾降先是至正十五年明鑑聚眾淮西以青布爲號名青軍人呼爲一片瓦其黨張監驍勇善用槍又號爲長槍軍暴悍專事剽掠由含山全椒轉掠六合天長至揚州人皆苦

之時鎮南王博囉布哈鎮揚州招降明鑑等以爲濠泗
義兵元帥俾駐揚州分屯守禦久之明鑑等以食盡復
謀佯亂說鎮南王曰朝廷遠隔事勢未可知今城中糧
乏眾無所託命歿下世祖孫當正大位爲我輩主出兵
南攻以通糧道救饑窘不然人心必變禍將不測鎮南
王仰天哭曰汝不知大義如汝言我何面目見世祖于
宗廟耶麾其眾使退明鑑等不從呼譟而起因逐鎮南
王而據其城鎮南王走淮安爲趙君用所殺明鑑等兇
暴益甚屠城中居民以爲食至是兵大敗不支乃出降
得其眾數萬置淮海翼元帥府命元帥張德麟耿再成

守之改揚州路爲淮海府以李德林知府事城中居民
僅存十八家德林以舊城虛曠難守乃截城西南隅築
而守之 戊戌曹州賊入太行山達實巴圖爾與知樞
密院事達哩瑪實里以兵討曹州賊官軍敗潰達哩瑪
實里死之 是月靜江路山崩地陷大水 關中賊散
走南山者出自興元陷秦隴據鞏昌有窺鳳翔之志察
罕特穆爾卽分兵入守鳳翔而遣謀者誘賊圍其城賊
果來圍之厚數十重察罕特穆爾自將鐵騎晝夜馳二
百里往赴比去城里所分軍張左右翼掩擊之城中軍
亦開門鼓譟而出內外合擊呼聲動天地賊大潰自相

踐蹂斬首數萬級伏屍百餘里餘黨皆遁還關中悉定
十一月辛丑山東道宣慰使董搏霄復請令江淮等
處各枝官軍分布連珠營寨於隘口屯駐守禦且廣屯
田以足軍食從之 汾州桃杏花 壬寅賊侵壺關察
罕特穆爾以兵大破之 十二月丙戌徐壽輝將明玉
珍陷重慶路據之玉珍隨州人世農家身長八尺目重
瞳以信義爲鄉黨所服初聞壽輝兵起集鄉兵屯于青
山結柵自固未幾降于壽輝授元帥隸倪文俊麾下鎮
沔陽與官軍戰湖中飛矢中右目微眇旣而以兵千人
槩斗船五十沂夔而上時青巾盜李喜喜聚兵苦蜀義

兵元帥楊漢以兵五千禦之屯平西左丞相鄂勒哲圖
鎮重慶置酒飲漢欲殺之漢覺脫身走順流下巫峽遇
玉珍訟之且言重慶可取狀玉珍未決萬戶戴壽曰攻
重慶事濟據蜀不濟歸無損也從之遂進克其城鄂勒
哲圖遁父老迎入城玉珍禁侵掠市肆晏然降者相繼
己丑吳國公下令釋輕重罪囚以干戈未寧人心初
附故也 丁酉慶元路象山縣鵝鼻山崩 戊戌翰林
學士承旨歐陽元卒初汝穎盜起蔓延南北州縣幾無
完城元獻招捕之策千餘言時不能用遂乞致仕帝不
允會大赦宣赴內府元久病不能步履丞相傳旨肩輿

至延春閣下及卒賜賻甚厚贈大司徒追封楚國公謚曰文元性度雍容處已儉約爲政廉平歷官四十餘年冊命制誥多出其手 己亥流星如金星大尾約長三尺餘起自太陰近東而沒化爲青白氣 庚子太尉四川行省左丞相達寶巴圖爾卒于軍中時詔遣知院達理瑪實哩來援分兵雷澤濮州而達理瑪實哩爲劉福通所殺達勒達諸軍皆潰達寶巴圖爾力不能支退駐石村朝廷頗疑其玩寇失機使者促戰相踵賊覘知之詐爲達寶巴圖爾通和書遺諸道路使者果得之以進達寶巴圖爾知之一夕憂憤死 初毛貴陷益都般陽

等路帝命董搏霄從知樞密院事布蘭奚討之而濟南
又告急搏霄提兵援濟南賊眾自南山來攻濟南望之
兩山皆赤搏霄按兵城中先以數十騎挑之賊眾悉來
鬪騎兵少卻至礮上伏兵起遂合戰城中兵又大出大
破之而般陽賊復約泰安之黨踰南山來襲濟南搏霄
列兵城上弗爲動賊夜攻南門獨以矢石禦之黎明乃
潛開東門放兵出賊後旣旦城上兵皆下大開南門合
擊之賊敗走復追殺之賊眾無遺者于是濟南始寧詔
就陞淮南行樞密院副使兼山東宣慰使都元帥仍賜
上尊金帶楮幣名馬以勞之有疾其功者譖于總兵太

尉努都爾噶令搏霄依前詔從布蘭奚同征益都搏霄
卽出濟南城屬老且病請以其弟昂霄代領其眾朝廷
從之授昂霄淮南行樞密院判官未幾命搏霄守河間
之長蘆 是冬張士誠築城虎邱山因高據險役月餘
而畢 是歲詔諭濟寧李秉彝田豐等令其出降殺復
元任嘯亂士卒仍給資糧欲還鄉者聽 義兵千戶余
寶殺其知樞密院事實圖以叛降于毛貴余寶遂據棣
州 集賢大學士兼太子左諭德許有壬以老病乞致
仕許之有壬前朝舊德皇太子頗加敬禮一日入見方
臂鷹爲樂遽呼左右屏去始見之 盜據齊魯中書參

知政事崔敬與平章達覽參政諳曾分省陵州陵州乃
南北要衝無城郭而居民散處敬供給諸軍事無不集
丞相以其能上聞賜之上尊仍命其便立行事敬以軍
馬供給浩繁而民力已疲乃請行納粟補官之令詔從
之河北燕南士民接踵而至積粟百萬石綺段萬匹以
給軍費民獲少蘇 中書右丞烏古遜良楨論罷陷賊
延坐之令有惡少年誣知立興州張復通賊之罪中書
將籍其孥吏抱案請署良楨曰手可斷案不可署同列
變色卒不署良楨自左曹登政府多所建白罷福建山
東食鹽浙東西長生牛租瀕海被灾圍田稅民皆德之

至正十八年春正月丙午趙魯勝陳友諒等陷安慶淮南行省右丞余闕死之賊之來攻也初自東門登城闕簡死士擊却之已而併軍攻東西二門又擊却之賊恚甚乃樹柵起飛樓臨城闕分命諸將各以兵扞賊晝夜不得息賊益生兵來攻是日魯勝軍東門友諒軍西門饒州祝寇軍南門羣盜四面蟻集外無一甲之援西門勢尤急闕身當之徒步提戈爲士卒號哭止之揮戈愈力仍分麾下將督三門之兵自以孤軍血戰斬首無算而闕亦被十餘創日中城陷火起闕知不可爲引刀自剄墮清水塘中妻耶氏子德生女福童皆赴

并死同時死者守臣韓建一家被害建方臥疾罵賊不屈賊執之以去不知所終城中民相率登城樓自捐其梯曰寧俱死此誓不從賊焚死者以千計其知名者萬戶李宗可紀守仁陳彬金承宗元帥府都事特穆布哈萬戶府經歷段桂芳千戶和碩布哈新李盧廷玉葛延齡丘沓許元炎奏差烏圖縵百戶黃寅孫安慶推官黃圖倫岱經歷楊恒知事余中懷寧尹陳巨濟凡十八人闕號令嚴信與下同甘苦然稍有違令卽斬以徇嘗病不視事將士皆籲天求以身代闕強衣冠而出當出戰矢石亂下如雨士以盾蔽闕闕卻之曰汝輩亦有命何

蔽我爲故人爭用命稍暇卽注周易帥諸生謁郡學會
講立軍士門外以聽使知尊君親上之義有古良將風
烈或欲輓之入翰林闕以國步危蹙辭不往遂死於安
慶贈淮南江北行省平章追封國公諡忠宣攷異余從元史本傳書之錢辛相曰余公贈諡諸書所載互異程國儒序青陽集云諡文忠追封夏國公張紳以爲初封夏國公諡忠愍改贈國公諡忠宣丁鶴年又稱爲余文貞公宋景濂手定元史而集中余左丞傳亦作文忠未審孰得其真余按改諡之說近是議者謂兵興以來死節之臣余闕

與褚布哈爲第一

庚戌張士誠兵攻常州吳守將湯

和擊敗之獲卒數百人

吳行樞密院判鄧愈遣部將

王弼等攻婺源州兵至城西與守將特穆爾布哈戰自

旦至日昃殺傷五百餘人不下乙卯

致墨元史本紀作庚戌今從後編

分兵爲三道竝進遂拔其城特穆爾布哈死之士卒皆降凡三千餘人復遣萬戶朱國寶攻高河壘克之乙丑大風起自西北益都土門萬歲碑仆而碎丙寅田豐陷東平路丁卯知樞密院事布蘭奚與毛貴戰于好右橋官軍收績走濟南是月詔達實巴圖爾子博囉特穆爾爲河南行省平章政事總領其父原管軍馬詔察罕特穆爾屯陝西李思齊屯鳳翔二月己巳朔議團結西山寨大小十一處以爲保障命中書右丞達實特穆爾左丞烏古遜良楨等總行提調設萬夫長

千夫長百夫長編立牌甲分守要害互相策應 毛貴陷青滄二州遂據長蘆鎮 中書省奏以陝西軍旅事劇去京師道遠供費艱難請就陝西印造寶鈔爲便從之遂分戶部寶鈔府等官置局印造仍命諸路撥降鈔本昇平準行用庫倒易昏幣布于民間 癸酉毛貴陷濟南路守將愛迪戰死毛貴立賓興院選用故官以姬京周等分守諸路又于萊州立三百六十屯田每屯相去三十里造大車百兩以挽運糧儲官民田十止收三分冬則陸運夏則水運 董搏霄將赴長蘆謂人曰我去濟南必不可保至是濟南果陷搏霄方駐兵南皮縣

之魏家莊適有詔拜搏霄河南行省右丞甫拜命毛貴
兵已至而營壘猶未完諸將謂搏霄曰賊至當如何搏
霄曰我受命至此當以死報國耳因拔劔督兵以戰而
賊眾突至搏霄前猝問爲誰搏霄曰我董老爺也眾刺
殺之無血惟見有白氣衝天是日昂霄亦死之事聞贈
搏霄河南行省平章政事追封魏國公諡忠定昂霄禮
部尙書追封隴西郡侯諡忠毅搏霄早以儒生起家輒
爲能吏會天下大亂復以武功自奮其才略有大過人
者而當時用之不能盡其才君子惜之 乙亥吳國公
以吳楨爲天興翼副元帥使與其兄良守江陰時江陰

兵不滿五千而與張士誠接境良兄弟訓練士卒嚴爲警備屯田以給軍餉敵不敢犯民甚賴之 吳國公命元帥康茂才爲管田使諭之曰比因兵亂隄防頽圯民廢耕耨故設管田司以修築隄防專掌水利今軍務殷繁用度爲急理財之道莫先于農春佗方興慮旱潦不時有妨農事故命爾此職分巡各處俾高無患乾卑不病潦務在蓄洩得宜大抵設官爲民非以病民若但使有司增飾館舍迎送奔走所至紛擾無益于民而反害之卽非委任之意 山東賊漸逼京畿辛巳詔以台哈布哈爲中書右丞相總兵討之 壬午田豐復陷濟寧

路甲戌陷輝州丙戌努都爾噶聞田豐近逼東昌棄城
走城遂陷 丁亥察罕特穆爾調兵復涇州平涼休鞏

昌 庚寅王士誠自益都犯懷慶路守將周全擊敗之

丁酉興元路陷 三月己亥朔日色如血 加右丞

相綽斯戢太保 庚子毛貴陷般陽路 辛丑大同路

夜黑氣蔽西方有聲如雷少頃東北方有雲如火交射

中天徧地俱見火空中有兵戈之聲 癸卯王士誠陷

晉寧路總管杜賽因布哈死之 己酉劉福通遣兵犯

衛輝河南行省平章博囉特穆爾擊走之進克濮州

庚戌毛貴陷薊州徵四方兵入衛詔察罕特穆爾以兵

屯涿州察罕特穆爾卽畱兵戍清湫義谷屯潼關塞南山口以備它盜而自將精銳赴召。毛貴率眾由河間趨直沽乙卯遂犯鄴州至棗林已而略柳林蹂躪旬樞密副使達國珍戰死人心大駭廷臣或勸乘輿北巡以避之或勸遷都關陝眾論紛然獨左丞相泰費音執不可帝乃命同知樞密院事劉哈喇布哈以兵拒之戰于柳林官軍捷賊退走京師乃安。吳國公命提刑按察司僉事分巡郡縣錄囚凡笞罪者釋之杖者減半重囚杖七十其有賊者免徵武將征討有過者皆宥之左右或言去年釋罪囚今年又從末減用法太寬則人不畏

法無以爲治吳國公曰自器亂以來民初離創殘以歸于我正當撫綏之況其間有一時誤犯者寧可盡法乎大抵治獄以寬厚爲本而刑新國則宜用輕典若執而不變非時措之道也 丙辰吳國公遣兵取建德路先是鄧愈朱文忠胡大海率兵由昱嶺關進攻建德道出遂安長槍元帥余子貞以兵來拒愈等擊敗之追至淳安降其眾三千餘人遂安守將洪某率兵五千援淳安大海與之戰擒將士四百餘人由是直抵建德參政布哈院判慶壽等皆遁父老何良輔等以城降改建德路爲嚴州府 以周全爲湖廣行省參知政事統鄂囉等

軍移鎮嵩州白龍寨 丁巳田豐陷益都路 察罕特
穆爾欲赴召涿州而曹濮賊方分道踰太行焚上黨掠
晉冀陷雲中鴈門上郡烽火數千里復大掠而南察罕
特穆爾留禦之先遣兵伏南山阻隘而自勒重兵屯聞
喜絳州賊果出南山縱伏兵橫擊之賊皆棄輜重走山
谷遂分兵屯澤州塞碗子城屯上黨塞吾兒谷屯并州
塞井陘口以杜太行諸道賊屢至守將數面戰擊卻之
河東悉定進陝西行省右丞兼行臺侍御史同知河南
行樞密院事于是朝廷乃詔察罕特穆爾守禦關陝晉
冀鎮撫漢沔荆襄便宜行事察罕特穆爾益務練兵訓

農以平定四方爲己責 夏四月己巳朔趙會勝自樅
陽寇池州陷之執吳守將趙忠 庚午江浙行省左丞
楊鄂勒哲以舟師攻徽州吳將胡大海等擊敗之丁丑
鄂勒哲又攻建德吳將朱文忠擊敗之鄂勒哲遁去
甲申陳友諒陷龍興路省臣道通和尼齊棄城遁 壬
午田豐陷廣平路大掠退保東昌詔元帥方托克托以
兵復廣平 癸未以諸處捷音屢至詔頒軍民事宐十
一條 甲午陳友諒遣部將王奉國陷瑞州路 是月
帝如上都 察罕特穆爾李思齊會宣慰使張良弼郎
中郭擇善宣慰同知拜特穆爾平章政事定珠總帥汪

長生努各以所部兵討李喜喜于鞏昌李喜喜敗入蜀
察罕特穆爾駐清湫思齊駐斜坡良弼駐秦州擇善駐
崇信拜特穆爾駐通渭定珠駐臨洮各自除路府州縣
官徵納軍需思齊良弼同謀襲殺拜特穆爾分總其兵
思齊尋又殺擇善 五月戊戌弼以方國珍爲江浙行
省左丞兼海道運糧萬戶 察罕特穆爾遣其將以兵
復興寧 劉福通攻汴梁壬寅守將珠展舊作竹
貞今改棄城
遁福通遂入城立宮闕自安豐迎其主小明王居之以
爲都 陳友諒遣部將康泰邵宗鄧克明等以兵寇邵
武路 庚戌陳友諒陷吉安路 癸丑監察御史密濟

爾海七十等劾太保中書右丞相台哈布哈乙卯削台
哈布哈官安置蓋州初台哈布哈奉命討賊既渡河卽
上疏謂賊勢張甚軍行宜以糧餉爲先管漢韓信行軍
蕭何餽糧方今措置無如丞相泰費音者如今泰費音
至軍中供給事乃可濟不然兵不能進矣其意實銜泰
費音欲其至軍中卽害之也時參知政事布延特穆爾
張晉等分省山東二人者嘗劾壽圖不進兵台哈布哈
至則以其餽運不前斷遣之又以知樞密院事鄂勒哲
特穆爾爲右丞之日嘗劾其罪亦加以失誤專制之罪
擅改其官徵至軍欲害之事聞廷議喧然左丞相泰費

肯以其欲害己也遂諷御史劾其緩師拒命而于帝前
力排之于是下削奪之詔以知樞密院事烏蘭哈達代
總其兵仍命烏蘭哈達節制河北諸軍河南行省平章
政事周全節制河南諸軍 辛酉陳友諒兵陷撫州路
是月山東地震天雨白毛 六月戊辰嗣台哈布哈
伏誅台哈布哈聞有詔夜馳詣劉哈喇布哈求救解剌
哈喇布哈故台哈布哈部將也以破賊累有功拜淮南
行省平章政事時駐兵保定見台哈布哈至因張樂大
宴舉酒慷慨言曰丞相國家柱石有大勲勞如此天子
終不害丞相是必爲讒言所間我當往見上白之丞相

母憂也卽走至京見泰費音泰費音問其來故哈喇布
哈具以告泰費音曰台哈布哈大逆不道今詔已下爾
乃敢妄言耶不審處禍將及爾矣哈喇布哈聞泰費音
言噤不能發泰費音度台哈布哈必在哈喇布哈所卽
語之曰爾能致台哈布哈以來吾以爾見上爾功不細
矣哈喇布哈因許之泰費音乃引入見帝賜賚良渥初
哈喇布哈之事台哈布哈也與倪晦者同在幕下台哈
布哈每委任晦而哈喇布哈計多阻不行哈喇布哈心
常以爲怨及是知事已不可解還縛台哈布哈父子送
京師未至皆殺之于路

察罕特穆爾調浩爾齊

舊倫
虎林

赤今關保同守潞州拜察罕特穆爾陝西行省平章政
事便立行事癸酉吳左副都指揮使朱文忠率兵攻
浦江下之義門鄭氏舉家避兵山谷間文忠重其累世
雍睦訪得之悉送還家禁兵士無侵犯吳中翼左副
元帥謝再興等率兵略石埭縣與陳友諒兵遇擊敗之
擒其將錢清等三人庚辰關先生破頭潘等陷遼州
浩爾齊以兵擊走之關先生等遂陷晉寧路城中死者
十二三郡人喬彝性高介有守名稱重一時至是整衣
冠歎妻子家有大井彝坐其上令妻子婢妾輩循次投
井中而已隨赴之賊首王士誠使人至彝家邀致之至

則彛死矣賊平贈彛臨汾縣尹賜諡純潔有張崑起者
汾州人也嘗用薦徵爲國子助教居一歲免歸賊去晉
寧復陷汾州崑起與妻亦赴井死晉寧人王佐爲賊所
獲欲降之佐詬詈不輟亦遇害 乙酉命左丞相秦寶

音督諸軍守禦京城便立行事 甲午張士誠兵寇常

熟縣吳守將廖永安與戰于福山港大破之 自江南

行臺移治紹興卽檄達嚕噶齊邁爾古斯爲行臺鎮撫

邁爾古斯大募民兵爲守禦計與舒嚕立遜

舊俗石抹
立孫今改

夾攻處州山賊遂平之擢江東廉訪司經歷仍留紹興

以兵衛臺治時浙東西郡縣多殘破獨邁爾古斯保障

紹興境內晏然民愛之如父母達實特穆爾承制授行
樞密院判官分院治紹興及方國珍遣兵侵據紹興屬
縣邁爾古斯曰國珍本海賊今既降爲大官而復來害
吾民可乎欲率兵問罪先遣部將黃中取上虞朝議方
倚重國珍資其舟以運糧而御史大夫拜珠格與國珍
素通賄賂情好甚厚憤邁爾古斯擅舉兵且恐生事卽
使人召至私第計事至則命左右以鐵鎚搥殺之斷其
頭擲廁溷中民間之無不慟哭邁爾古斯寧夏人也黃
中率其眾復讎盡殺拜珠格家人及臺府官員掾吏獨
畱拜珠格不殺以告于張士誠士誠乃遣其將呂珍以

兵守紹興拜珠格尋遷行宣政院使監察御史眞圖劾
拜珠格陰害帥臣幾致激變立寘諸嚴刑詔削其官安
置湖州而已

攷異輟耕錄以拜奇格爲
自劾納印綬去今從元史

秋七月丁酉

朔河南行省平章政事周全據懷慶路以叛附于劉福
通時察罕特穆爾駐軍洛陽遣拜特穆爾以兵守碗子
城周全來戰拜特穆爾爲其所殺全遂盡驅懷慶民渡
河入汴梁 庚子吳廖永安敗張士誠于狼山獲其戰
艦而還 丁未布蘭奚以兵復般陽路已而復陷 癸
丑賊兵犯京城刑部郎中布哈守西門夜開門擊退之
丙辰吳總管胡通海等襲破九華山寨時寨首鮑萬

戶有眾二千據險自固四面設礮石機弩兵不能進通
海乃引兵潛由磴道攀援魚貫而上因風縱火燔其寨
遂克之 已未劉福通遣周全引兵攻洛陽守將登城
以大義責全全愧謝退兵福通殺之全之攻洛陽也察
罕特穆爾以奇兵出宜陽而自將精騎發新安來援會
賊已退因追至虎牢塞諸險而還 是月京師大水蝗
民大饑 是月江南行省右丞郭天爵謀害吳國公事
覺吳國公殺之天爵天秩之弟也 八月丁卯朔江浙
行省平章錫達布討饒州貪財玩寇久無功遂妄稱遷
職福建行省至福建爲廉訪僉事般若特穆爾所劾拘

之興化路 庚辰陳友諒兵陷建昌路 辛巳義兵萬戶王信以滕州叛降于毛貴 己丑張士誠兵寇江陰吳守將吳良擊走之 江浙行省丞相達實特穆爾陰約張士誠以兵攻楊鄂勒哲鄂勒哲倉卒不及備遂自殺其眾皆潰鄂勒哲築營德勝堰周圍三四里子女玉帛皆在焉用法深刻任意立威而鄧子文金希伊王彥良之徒又悉邪佞輕佻左右交煽達實特穆爾惡之士誠素欲圖鄂勒哲遣其部將史文炳往杭州謁鄂勒哲相見甚歡文炳大設宴盛陳烏銀器皿嵌金鐵鞍之類盡以遺鄂勒哲自是約爲兄弟及士誠與達實特穆爾

合謀文炳率眾圍鄂勒哲營鄂勒哲遣吏致性酒爲可憐之意曰願少須臾無死得以底裏上露文炳報不可鄂勒哲乘城拒戰十日力盡自經死其弟巴延亦自殺文炳解衣裹鄂勒哲屍瘞祭之其後追封鄂勒哲潭國公諡忠愍巴延衡國公諡忠烈鄂勒哲部將員成等欲爲報仇遣苗軍元帥台哈布哈奉書納款于建康且言其部將李福等三萬餘人在桐廬皆願效順吳國公命朱文忠往撫之 庚寅以婁都爾蘇爲御史大夫詔作新風紀 九月丁酉詔授錫班特穆爾同知河東宣慰司事其妻雲中郡夫人子觀音努贈同知大同路事

仍旌表其門先是錫班特穆爾爲趙王位下總管府事其妻嘗保育趙王及是部落明里叛欲殺王錫班特穆爾與妻謀以其子觀音弩服王平日衣冠居王宮夜半夫妻衛趙王微服遁去賊至遂殺觀音弩趙王得免事聞故旌其忠焉 褒封唐贈諫議大夫劉蕡爲昌平文節侯 關先生攻保定路不克遂陷完州掠大同興和塞外諸郡 中書左丞張冲請立團練安撫勸農使司二道一奉元延安等處一鞏昌等處從之 壬寅詔中書參知政事布延布哈治書侍御史李國鳳經畧江南癸卯詔以福建行省平章政事慶圖爲江南行臺御

史大夫時行臺治紹興所轄諸道多爲吳所有而明台則制于方國珍杭蘇則制于張士誠憲臺綱紀不復可振徒存空名而已 丙午賊兵攻大同路壬戌平定州

陷 乙丑陳友諒陷贛州路江西行省參政全晉諳薩里及總管哈納齊死之時江西下流諸郡皆爲友諒所據晉諳薩里乃與哈納齊戮力同守友諒遣其將圍城因使人脅之降晉諳薩里斬其使日擐甲登城拒之力戰凡四月兵少食盡遂自刎哈納齊守贛尤有功城陷之日賊將脅之使降哈納齊謂之曰與汝戰者我也爾毋殺吾民當速殺我遂遇害 冬十月辛未

欽異元史本紀作壬

申今從後編

吳將胡大海取蘭溪州先是大海至婺之鄉頭
擒萬戶趙布延布哈等平其五壘是日進攻蘭溪官軍
千人出戰敗之克其城廉訪使趙秉仁等被執立寧越
翼元帥府分兵守其要害遂進攻婺州路 甲戌吳將
徐達邵榮克立興先是達等攻立興久不下吳國公遣
使謂達等曰立興城小而堅猝未易拔聞其城西通太
湖口張士誠餉道所由出若以兵斷其餉道彼軍食內
乏城必破矣達等乃分兵絕太湖口而并力急攻遂拔
其城同知樞密院事廖永安復率舟師擊士誠于太湖
乘勝漢入遇呂珍戰敗遂爲所獲士誠欲降之不屈

壬午監察御史楊珠布哈劾中書右丞相綽斯戩任用

私人都埒

舊作榮列今改

及妄弟崔鄂勒哲特穆爾

舊作崔完者帖木兒

改今印造偽鈔事將敗令都埒自設以滅口綽斯戩乃請

解機務詔止收其印綬乙酉監察御史達爾瑪實哩王

彝等復劾之請正其罪帝終不聽 壬辰大同路陷達

魯噶齊鄂勒哲特穆爾棄城遁 是月博囉特穆爾統

領諸軍復曹州 十一月辛丑吳立管領民兵萬戶府

吳國公曰古者寓兵于農有事則戰無事則耕暇則講

武今兵爭之際當因時制宜所定郡縣民間武勇之材

宜精加簡拔編緝爲伍立民兵萬戶府領之俾農時則

耕閑則練習有事則用之事平有功者一體陞擢無功者還爲民如此則民無坐食之弊國無不練之兵以戰則勝以守則固庶幾寓兵于農之意也 癸卯陳友諒

陷汀州路 丁卯田豐陷順德路先是樞密院判官劉

起祖守順德糧絕劫民財掠牛馬民強壯者令充軍弱者殺而食之至是城陷起祖遂盡驅其民走入廣平

甲子吳國公以胡大海兵攻婺州不克乃自將親軍副都指揮使楊璟等師十萬往攻之 十二月乙丑朔日有食之 癸酉關先生破頭潘沙劉二等由大同直犯上都焚燬宮闕畱七月乃轉略遼陽 甲申吳取婺州

路達嚙嚙齊僧珠浙東廉訪使楊惠死之先是吳國公
出師至徽州召儒士唐仲實問漢高帝光武唐太宗宋
太祖元世祖平一天下其道何由對曰此數君者皆以
不嗜殺人故能定天下于一公英明神武驅除禍亂未
嘗妄殺然以今日觀之民雖得所歸而未遂生息吳國
公曰此言是也我積少而費多取給于民甚非得已然
皆爲軍需所用未嘗以一毫奉己民之勞苦恒思所以
休息之曷嘗忘也又聞前學士朱升名召問之對曰高
築牆廣積糧緩稱王吳國公悅命參帷幄師進至德興
聞張士誠兵據紹興諸暨乃取道蘭溪以至婺州遣使

入城招諭不下遂圍之初江浙行省丞相達實特穆爾承制授浙東宣慰副使舒穆魯竑以行樞密院判官分治處州又以前江浙儒學副提舉劉基爲其院經歷蕭山縣尹蘇友龍爲照磨而竑遜又自倅郡人胡濙葉瑛章溫參謀其軍事處爲郡山谷聯絡盜賊憑險竊發不易平治竑遜用基等謀或擣以兵或誘以計皆殲殄無遺類尋陞同僉行樞密院事至是聞吳兵抵蘭溪且逼竑而竑遜第厚遜方守竑其母亦在城中竑遜泣曰義莫重于君親食祿而不事其事是無君也母在難而不赴是無親也無君無親尙可立天地哉卽遣胡濙等

將民兵數萬赴援而親率精銳爲之殿濶等至松溪觀望不能進吳國公謂諸將曰婺倚舒穆囑立遜故未肯卽下聞彼以獅子戰車載兵來援此豈知變者松溪山多路險車不可行今以精兵遏之其勢必破援兵旣破則城中絕望可不勞而下矣翌日僉院胡大海養子德濟誘其兵于梅花門外縱擊大敗之濶等遁去城中勢益孤臺憲將臣畫界分守意復不相能于是同僉樞密院甯安慶與都事李相開門納敵楊惠僧珠皆戰死南臺御史特穆爾賚斯院判舒穆囑厚遜等皆被執吳國公入城下令禁戢軍士剽掠民皆安堵改婺州路爲寧

越府置中書分省召儒士許元葉瓚胡翰汪仲山等十餘人皆會食省中日令二人進講敷陳治道以王宗顯知寧越府宗顯和州人少攻儒業博涉經史于是命宗顯開郡學延宿儒葉儀宋濂爲五經師戴良爲學正吳沈徐厚爲訓導時器亂之餘學校久廢至是始聞絃誦聲無不欣悅是月太白經天者再吳國公發倉賑寧越貧民有女子曾氏自言能通天文誑說災異惑眾吳國公以爲亂民命戮于市是歲河南賊蔓延河北前江西廉訪僉事巴延家居濮陽言于省臣將結其鄉民爲什伍以自保而賊已大至巴延乃渡漳北行鄉人

從之者數十萬家至磁州與賊遇賊知巴延名士生劫之以見其帥帥誘以富貴巴延罵不屈引頸受刃與妻子俱死之有司上其事贈僉太常禮儀院事太常上諡議曰以城守論之巴延無城守之責而死與江州守李黼同以風紀論之巴延無在官之責而死與西臺御史張桓同以平生有用之學成臨義不奪之節乃古之所謂君子人者請諡曰文節從之 江西諸郡皆陷撫州路總管吳當乃戴黃冠著道士服杜門不出日以著書爲事陳友諒遣人倅之當臥牀不食以死自誓乃舁牀載之舟送江州拘留一年終不爲屈遂隱居吉水縣之

谷坪踰年以疾卒 京師大饑疫而河南北山東郡縣

皆被兵各挈老幼男女避居京師以故死者相枕籍資

正院使保布哈

舊作朴不
花今改

請于帝市地收瘞之帝及皇

后皇太子省院諸臣施捨無筭而保布哈亦自出財賄

珍寶以佐其費擇地自南北兩城抵盧溝橋掘濠及泉

男女異壙人以一屍至者隨給以鈔昇負相踵至二十

年四月前後瘞者二萬用鈔二萬七千九十餘錠凡居

民病者予之藥不能器者給之棺翰林學士承旨張翥

爲文頌其事曰善惠之碑保布哈高麗人亦曰王布哈

皇后奇氏微時與布哈同鄉里相爲依倚及布哈以閹

人人事後累遷爲資正院使后益愛幸之至是欲要譽
干權故有斯舉 帝嘗爲近幸臣建宅親畫屋樣又自
削木構宮高尺餘棟梁楹檻宛轉皆具付匠者按此式
爲之京師遂稱魯般天子內侍利其金珠之飾告帝曰
此屋比某家殊陋劣帝輒命易之內侍因刮金珠而去
奇后見帝造佗不已嘗挽上衣諫曰陛下年已大子年
已長宜稍息造佗且諸夫人事上足矣無惑于天魔舞
女輩自愛惜聖躬也帝艷然怒曰古今只我一人耶由
此兩月不至后宫后亦多畜高麗美人大臣有權者輒
以此遺之京師達官貴人必得高麗女然後爲名家自

至正以來宮中給事使令大半高麗女以故四方衣服
鞞帽器物皆仿高麗舉世若狂

續資治通鑑卷第二百十四

續資治通鑑卷第二百十五

聖主發帑以賑饑饉有都御史趙鼎北湖專學地之義務精世藝一筆聖朝是編集

元紀三十三

起屠維大淵獻正月盡上章因敦六月凡一年有奇

順帝

至正十九年春正月陳友諒遣其黨王奉國率兵號二

十萬寇信州路江東廉訪副使巴延布哈德濟

舊作伯顏不花

的斤今改自衢引兵援信遇奉國于城東力戰破走之鎮南

王子大聖努

舊作大聖奴今改

樞密院判官席閏等迎巴延布

哈德濟入城共守後數日賊復來攻巴延布哈德濟大

饗士卒出城奮擊又大敗之

秋異元史本紀春正月甲午朔陳友諒兵陷信州路

守臣江東廉訪副使巴延布哈德濟力戰死之蓋連書其事耳忠義傳云巴延布哈德濟于正月自衛援信大破賊至六月而城始陷乃自刎今從傳

乙巳吳國公以寧越既定欲遂取浙東未下諸郡集諸將論之曰克城雖以武而定民必以仁吾師比入建康秋毫無犯故一舉而遂定今新克婺州正當撫恤使民樂于歸附則彼未下郡縣亦必聞風而歸吾每間爾等下一城得一郡不妄殺一人輒喜不自勝蓋爲將者能以不殺爲心非惟國家所利卽身及子孫亦蒙其福爾等從吾言則眾心豫附大功可成矣

丙午遼陽行省陷懿州路總管呂震死之贈河南行省左丞追封東平郡公

戊申吳將邵榮破張士誠

兵于餘杭。上都之初陷也，廣寧路總管郭嘉聞之，躬率義兵出禦。旣而遼陽陷，嘉將眾巡邏去城十五里，遇青號隊伍百餘人，給言官軍。嘉疑其詐，俄果脫青衣，變紅。嘉出馬射賊，分兵兩隊夾攻之，殺獲甚多。嘉見賊勢日熾，孤城無援，乃竭家所有衣服財物犒義士以勵其勇敢。且曰：自我祖父有勳王室，今之盡忠，吾分內事也。況身守此土，當死生以之。餘不足恤矣。頃之賊至圍城，亘數十里，有大呼者曰：遼陽我得矣！何不出降？嘉挽弓射其呼者，中左頰，墮馬死。賊稍引退。嘉遂開西門逐之。賊大至，力戰以死。事聞，贈河南江北行省左丞，追封太

原郡公謚忠烈嘉之守廣寧也招集義兵數千教以坐

伦進退號令齊一賞罰明信故東方諸郡糧富兵精稱

嘉為最 察罕特穆爾舊伦察罕帖木耳今改命樞密院判官陳

秉直班布爾實舊伦八不沙今改將兵二萬守冀寧 乙卯方

國珍遣使奉書獻金帶于吳先是吳國公遣典籤劉辰

招諭國珍國珍與其下謀曰方今元運將終豪傑竝起

惟江左號令嚴明所向無敵今又東下婺州恐不能與

抗況與我為敵者西有張士誠南有陳友定莫若姑示

順從藉為聲援以觀其變遂遣使奉書隨辰來獻金綺

于是復遣使報之然國珍雖納款其實陰持兩端也

戊午吳雄鋒翼元帥王遇成孫茂先率兵攻臨安縣張士誠遣其右丞李伯昇來援茂先擊敗之伯昇斂兵還守茂先攻之不下引兵還僉院胡大海攻諸暨守將戰敗宵遁萬戶沈勝以眾降遂改諸暨州爲諸全州嵎縣萬戶郝原請降于吳 二月甲子朔張士誠復攻江陰戰艦蔽江而下吳守將吳良禦之戒諸將勿輕動頃之士誠兵陳于江濱良命弟禎率一軍出北門與戰鋒纔交復遣元帥王子明率壯士出南門合擊之士誠不能支遂敗溺死甚眾 癸酉吳將邵榮攻湖州屢敗張士誠兵其將李伯昇斂兵還守攻之弗克乃還屯臨安

辛巳樞密副使多爾濟

舊倫朵兒只今改

以賊犯順寧命張立

將精銳由紫荆關出討鴉鵲由北口出迎敵 甲申叛

將梁炳攻辰州守將和尚擊敗之以和尚爲湖廣行省

參知政事

賊由飛狐靈邱犯蔚州

庚寅御史臺言

先是召募義兵用鈔銀一百四十萬錠多近侍權倖冒

名關支率爲虛數請命軍士凡已領官錢者立限出征

詔從之已而不果行

是月詔博囉特穆爾

舊倫字羅帖木兒今

改

移兵鎮大同以爲京師捍蔽 置大都督兵農司仍

置分司十道專督屯種以博囉特穆爾領之所在侵奪

民田不勝其擾

台哈布哈

舊倫太不花今改

之潰兵數萬掠

山西察罕特穆爾遣陳秉直分兵駐榆次招撫之其首領悉送河南屯種 三月癸巳朔陳友諒遣兵由信州

略衢州復遣兵陷襄陽路 甲午吳下令宥獄囚 辛

丑京城北兵馬司指揮周哈喇岱

舊哈喇岱今改

與林知和

等謀叛事覺伏誅

丁巳張士誠兵攻建德吳將朱文

忠禦之于東門使別將潛出小北門間道過鮑婆嶺由

碧鷄塢繞出其陳後夾擊大破之

方國珍遣郎中張

本仁以溫台慶元三路獻于吳且以其次子關爲質吳

國公曰古者慮人不從則爲盟誓盟誓不信變而爲質

子此衰世之事豈可蹈之凡人之盟誓交質者皆由未

能相信故也今既誠心來歸便當推誠相與如青天白日何自懷疑而以質子爲哉乃厚賜關而遣之關後改名明完 陳友諒遣部將趙普勝寇寧國太平縣江南總制胡惟賢命萬戶陳允同義士江炳叔率鄉兵五千擊敗之普勝復寇陵陽石埭等縣僉院張德勝與戰于柵江口復破走之 壬戌詔定科舉流寓人名額蒙古色目南人各十五名漢人二十名 夏四月癸亥朔汾水暴漲 賊陷金復等州司徒知樞密院事佛嘉努舊佛家奴今改調兵平之 甲子毛貴爲趙君用所殺 帝以天下多故詔卻天壽節朝賀皇太子及羣臣屢請舉行

如故帝不聽曰俟天下安寧行之未晚卿等無復言

癸酉吳兵復池州初趙普勝旣陷池州令別將守之而自據樅陽水寨數往來寇掠境上元帥徐達患其侵軼遣院判俞通海等擊敗之俘其將趙牛兒等普勝棄舟走陸又擒其部將洪鈞等并獲艤艫數百艘遂復池州吳僉院胡大海率元帥王玉等攻紹興軍至蔣家渡遇張士誠兵擊敗之獲戰艦五十餘又連戰于三山斗門白塔寺皆捷擒士誠卒五十餘人恐其叛悉斬于雙溪之上張士誠復攻建德駐兵大浪灘吳將朱文忠遣兵由烏龍嶺循胥口而上擊破之庚辰吳叛將陳

保二寇宜興守臣楊國拒戰擒保二檻送寧越伏誅

張士誠復遣兵爭建德據分水嶺朱文忠遣元帥何世明擊破其營 丁亥張士誠兵擊常州守將湯和擊敗

之 已丑賊陷寧夏路遂略靈武等處 張士誠將李

伯昇攻婺源吳將孫茂先擊敗之 五月壬辰朔以陝

西行臺御史大夫鄂勒哲特穆爾

舊倫完者帖木兒今改

爲陝西

行臺左丞相便宜行事

丁酉皇太子奏請巡北邊以

撫綏軍民御史臺臣上疏固畱詔從之

先是中書左

丞成遵言宋自景祐以來百五十年雖無兵禍常設寓

試名額以待四方游士今淮南河南山東四川遼陽及

江南各省所屬州縣避兵士民會集京師如依前代故
事別設流寓鄉試之科令避兵士民就試添差試官別
爲考校依各處元額選合格者充之則無遺賢之患矣
禮部議寓試解額依元額減半旣而福建鄉試取江西
流寓者十五人察罕特穆爾又請河南舉人及避兵儒
士不拘籍貫依河南元額就陝州應試從之 辛亥吳
國公將還建康召胡大海于紹興旣至諭之曰寧越爲
浙東重地必得其人守之吾以爾爲才故特命爾守其
衢處紹興進取之宜悉以付爾宋巴延布哈舊佗伯顏
不花今改
在衢州其人多智術舒穆魯伊遜舊佗石抹
宜孫今改守處州善

用士紹興爲張士誠將呂珍所據數郡與寧越密邇爾
宜與常遇春同心協力伺間取之此三人皆勦敵不可
忽也仍命左右司員外侯原善都事王愷管句樂鳳綜
理錢糧軍務事未幾有三人稱趙宋子孫請再命大海
攻紹興願爲內應吳國公知其詐命法司拷問乃張士
誠使爲間并其家屬誅之 山東河東河南及關中等
處飛蝗蔽天人馬不能行所落溝塹盡平民大饑 察
罕特穆爾圖復汴梁是月以大軍次虎牢先發游騎南
道出汴南略歸亳陳蔡北道出汴東戰船浮于河水陸
並下略曹南據黃陵渡乃大發秦兵出函關過虎牢晉

兵出太行踰黃河俱會汴城下首奪其外城察罕特穆爾自將鐵騎屯杏花營諸將環城而壘劉福通屢出戰戰輒敗遂嬰城以守察罕特穆爾乃夜伏兵城南旦日遣苗軍跳梁者略城而東福通傾城出追伏兵鼓譟起邀擊敗之又令弱卒立柵外城以餌敵敵出爭之弱卒佯走薄城西因縱鐵騎突擊悉擒其眾福通自是不敢出先是陳友諒弟友德營于信州城東繞城植木柵急攻之巴延布哈德濟日夜與賊鏖戰糧竭矢盡而氣不少衰有大呼于城下者曰有詔參謀該里丹舊倫海魯丁今改臨城問何來曰江西來該里丹曰如此乃賊耳吾大

元臣子豈受爾僞詔汝不聞張睢陽事乎僞使者不答而去時軍民唯食草苗茶紙既盡括韉底煮食之又盡羅掘鼠雀及殺老弱以食然猶出兵大破賊六月王奉國來攻城晝夜不息者踰旬已延布哈德濟登城麾兵拒之已而士卒力疲不能支萬戶顧馬兒以城叛城遂陷席閏出降大聖努該里丹皆死之巴延布哈德濟力戰不勝遂自刎部將蔡誠盡殺妻子與蔣廣奮力巷戰誠遇害廣爲奉國所執愛廣勇敢使之降廣曰我寧爲忠死不爲降生汝等草中一盜爾吾豈屈汝乎奉國怒磔廣于竿廣大罵而絕時義兵陳受戰敗爲賊所擒亦

痛罵不屈賊焚之先是巴延布哈德濟之援信州也嘗
南望泣下曰我爲天子司憲視彼城之危急忍坐視乎
吾所念者太夫人耳即入拜其母鮮于氏曰兒今不得
事母矣母曰爾爲忠臣吾即死何憾巴延布哈德濟因
命子額森布哈奉其母問道入福建以江東廉訪司印
送行御史臺遂力守孤城而死謚曰桓毅 甲子張士
誠將呂珍圍諸全州胡大海自寧越率兵救之珍堰水
以灌城大海奪堰反以灌珍珍勢蹙乃于馬上折箭求
解兵大海許之王愷謂大海曰彼猾賊難信不如因而
擊之可大勝也大海曰吾已許人而背之不信縱其去

而擊之不武遂引兵還 是月吳僉院俞通海攻趙普
勝不克而還諸將患之吳國公曰普勝勇而無謀陳友
諒挾主以令眾上下之間心懷疑貳用計以離之一夫
之力耳時普勝有門客頗通術數常爲普勝畫策普勝
倚爲謀主乃使人陽與客交而陰間之又致書與客故
誤達普勝普勝果疑客客懼不能安遂來歸于是厚待
客客喜過望傾吐其實盡得普勝生平所爲乃重以金
幣資客潛往說友諒所親以間普勝普勝不知見友諒
使者輒自言其功悻悻有德色友諒由是忌之 秋七
月壬辰朔以遼陽賊勢張甚起前中書右丞相綽斯戢

舊倫憐思
監今改

爲遼陽行省左丞相優宜行事

乙巳吳同

僉樞密院常遇春攻衢州建奉天旗樹柵圍其六門造

呂公車仙人橋長木梯懶龍爪擁至城下高與城齊欲

階之以登又于大西門大南門城下穴地道攻之守臣

廉訪使宋巴延布哈等悉力備禦以束葦灌油燒呂公

車架千斤稱鉤懶龍爪用長斧以砍木梯築夾城以防

穴道遇春攻之弗克乃以奇兵出其不意突入南門窺

城毀其所架礮督將士攻圍益急 戊申命國王囊嘉

特舊倫囊加
歹今改

中書平章政事佛嘉努

舊倫佛家
奴今改

額森布

哈

舊倫也先
不花今改

知樞密院事赫嚕

舊倫黑
驢今改

等統領特默齊

舊作撲馬
赤今改

軍進征遼陽

趙君用既殺毛貴貴黨續繼

祖自遼陽入益都丙辰殺趙君用遂與其所部自相讐

敵彭早住不知其所終是月以張士信爲江浙行省

平章政事

八月辛酉朔倪文俊餘黨陷歸州

庚午

吳將朱文遜秦友諒攻無爲州取之

察罕特穆爾謀

知汴梁城中食且盡乃與諸將閻思孝李克彝虎林赤

等議分門而攻戊寅夜將士鼓勇登城斬關而入遂拔

之劉福通奉其主小明王從數百騎出東門遁走仍據

安豐獲僞后及賊妻子數萬僞官五千符璽印章寶貨

無筭全居民二十萬軍無所私市不易肆不旬日河南

悉定獻捷京師以功拜河南行省平章政事兼知河南
行樞密院事陝西行臺御史中丞仍優宜行事詔告天
下察罕特穆爾既定河南乃以兵分鎮關陝荆襄河洛
江淮而重兵屯太行營壘旌旗相望數千里乃日修車
船繕兵甲務農積穀訓練士卒謀大舉以復山東已
卯蝗自河北飛渡汴梁食田禾盡九月癸巳以中書
平章政事特哩特穆爾舊倫帖里帖木兒今改爲陝西行省左丞
相優宜行事吳奉國上將軍徐達僉院張德勝率兵
自無爲州登陸夜至浮山寨敗趙普勝別將于青山追
至潛山陳友諒遣參政郭泰渡沙河逆戰德勝復大破

之斬郭泰遂克潛山命將守之 乙未陳友諒殺其將
趙普勝初友諒旣忌普勝又有言普勝欲歸吳者及是
憤潛山之敗友諒益欲殺普勝乃詐以會軍爲期自至
安慶圖之普勝不虞友諒之圖已聞其至且燒羊出迎
于鴈汊登舟見友諒友諒遂執而殺之併其軍 乙巳
以湖南北浙東西四道廉訪司之地皆陷詔任其所便
之地置司 丙午夜白虹貫天 丁未吳取衢州路時
常遇春圍城兩月餘攻擊無虛日樞密院判張斌度不
能守密遣其下約降是夕斌潛出小西門迎吳軍入城
宋巴延布哈不知其降猶督兵拒戰俄而城中火起遇

春等入城祇遂潰總管馮浩赴水死宋巴延布哈及院

判都尼

舊作榮
粘今改

等被執改衢州路爲龍游府進遇春僉

樞密院

甲寅吳遭博士夏煜授方國珍福建行省平

章參政國珉僉樞密分院事各給符印仍以所部兵馬

城守候命征討煜至慶元國珍欲不受業已降欲受之

又恐見制乃詐稱疾但受平章印告老不任職遇使者

亦頗倨惟國珉開院署事

自中原悉亂江南漕久不

通至是河南始平乃遣兵部尚書巴延特穆爾

舊作伯
顏帖木

兒今

改戶部尚書曹履亨以御酒龍衣賜張士誠徵海運

糧巴延等至杭州傳詔令方國珍具舟以迎而達實特

穆爾

舊作達識帖睦爾今改

總督其事既而土誠慮國珍載粟不

入京國珍又恐土誠掣其舟乘虛襲已互相猜疑巴延

往來開諭二人乃奉詔 冬十月庚申朔詔京師十一

門皆築甕城造吊橋 以方國珍爲江浙行省平章政

事 壬申吳元帥俞廷玉率兵攻安慶不克卒于軍廷

玉僉院通海之父也 張士誠兵攻江陰吳守將吳良

遣萬戶聶貴蔡顯率眾間道出無錫三山絕其後士誠

兵遁去 張士信大發浙西諸郡民築杭州城分爲三

番以一月更代皆裹糧遠役而督事長吏復藉之酷斂

鞭扑箠楚死者相望自七月興工至是月始畢僚屬爲

立碑以紀功初嘉興通判繆思恭嘗張士信來攻楊鄂
勒哲命典火攻官軍大捷及是城杭州士信檄思恭統
所屬工徒就役欲乘此僇辱之俾治西北面數十百丈
思恭每佗則先人止則後罷勞來督罰殊得眾心視他
所築倍堅好士信亦無柰何一日巡工至其所日已暮
而工猶未輟士信日日入而息何獨勞民如此思恭曰
平章禮絕百司猶日夕敬其王事況小民敢偷餘晷士
信曰此人口利如錐何怪杉青牖畔烈烈偏人思恭曰
今幸太尉革面國家偕此得成獎順之興若念杉青之
役猶恨不力縱逸平章耳士信曰別駕好將息言及杉

青猶使人肉跳不止 十一月壬寅吳兵取處州路初
經略使李國鳳至浙東承制拜舒穆魯伊遜爲江浙行
省參知政事以守處州吳國公旣定寧越卽命耿再成
駐兵縉雲之黃龍山謀取處州至是僉院胡大海帥師
入境伊遜追元帥葉瑛屯桃花嶺參謀林彬祖屯葛渡
鎮撫陳仲賢照磨陳安屯樊嶺元帥胡濙守龍泉以拒
敵久之右司郎中劉基棄官而歸伊遜無可與謀者將
士怠弛皆無鬪志大海乃出軍抵樊嶺與再成合攻之
連拔桃花嶺葛渡二砦進薄城下伊遜戰敗棄城走將
士皆潰敵遂克處州胡大海部將繆美分兵略定諸縣

得葉琰使諭胡淡曰吾王天授也士之欲立功名者不
以此時自附將誰與僇力且去年爾之孤戰而大敗今
年我之師不戰而勝則天意亦可見矣與其險阻偷生
旦夕何如改圖可以保富貴也淡然之乃出降龍泉慶
元皆平 戊申陳友諒兵陷杉關 十二月甲子張士
誠以分水之敗復遣其將據新城三溪結寨數出寇掠
吳元帥何世明擊破之斬其將分水兵潰去自是士誠
不敢窺嚴婺 戊辰吳國公命僉院常遇春帥師攻杭
州杭民尚奢侈無蓄積城門旣閉米旋盡糟糠與米價
等旣而糟糠亦盡以油車糠餅搗屑啖之餓死者十六

七 知樞密院事烏蘭哈達舊倫兀良哈台今改領台哈布哈軍

其所部方托克托舊倫方脫今改與弟方巴特穆爾舊倫方伯帖木

改兒今時保遼州烏蘭哈達屯孟州是月與察罕特穆爾

部將班布爾賁等交兵已而烏蘭哈達獨引達勒達軍

還京師方托克托等乃從察罕特穆爾先是陳友諒

破龍興其僞主徐壽輝欲徙居之友諒恐其來不利于

已遣人尼其行壽輝不得已而止至是壽輝復欲往友

諒仍遣人止之壽輝不聽引兵發漢陽行次江州友諒

陽遣使出迎而陰伏兵于城西門外壽輝既入門閉伏

發盡殺其部屬以江州爲都奉壽輝居之友諒自稱漢

王立王府于城西隅置官屬自此事權一歸于友諒壽
輝但擁虛位而已 上都宮闕既廢是歲以後帝不復
時巡帝在位久而皇太子春秋日盛軍國之事皆其所
臨決皇后奇氏乃謀內禪遣資政院使保布哈舊俗朴
不花今
改諭意于丞相泰費音泰費音不答皇后又召泰費音
至宮中舉酒申前意泰費音終依違而已太子欲去之
知樞密院事努都爾噶舊俗鉅的
該今改聞而歎曰善人國之
紀也苟去之國將何賴乎數于帝前左右之故太子之
志不得逞會努都爾噶卒太子遂決意去泰費音以中
書左丞成遵及參知政事趙中皆泰費音所用兩人去

則泰費音之黨孤于是監察御史邁珠

舊倫買佳今改

僧格實

哩

舊倫桑哥失里今改

承望風旨喉寶抵縣尹鄧守禮弟子初等

誣告邁中與參議蕭庸等六人皆受賊太子命御史臺

大宗正府等官雜問之鍛鍊使成獄邁等皆杖死中外

冤之泰費音知勢不可留數以疾辭位後數年御史臺

臣辯明邁等誣枉詔給還所授宣敕初江南行臺御

史大夫納琳

舊倫納奔今改

赴召由海道入朝抵黑水洋阻風

而還至是復由海道趨直沽山東俞寶率戰艦斷糧道

納琳命其子安安及同舟人拒之破其眾于海口遂抵

京師帝遣使勞以上尊皇太子亦饋酒脯而納琳感疾

日亟卒于通州年七十有九 京師有鴟鴞百羣夜鳴
至曉連月乃止居庸關子規啼 錢清場鹽司會稽楊
維禎遷江西儒學提舉未上值兵亂避地杭州張士誠
聞其名欲見之維禎謝不往復書斥其所用之人其略
曰閣下乘亂起兵首倡大順以獎王室淮吳之人萬口
一辭以閣下之所爲有今日不可及者四兵不嗜殺一
也聞善言則拜二也儉于自奉三也厚給吏祿而姦貪
必誅四也此東南豪傑望閣下之可與有爲者也然賢
人失職四民失業者尚不少也吾惟閣下有可畏者又
不止是動民力以搖邦本用吏術以括田租銓于忠人

不承制出納國廩不輸受降人不疑任私臣而復貳也
六者之中有其一二可以喪邦閣下不可以不省也況
爲閣下之將帥者有生之心無死之志矣爲閣下之守
令者有奉上之道無恤下之政矣爲閣下之親族姻黨
者無祿養之法有行位之權矣有假佞以爲忠者有託
詐以爲直者有飾貪虐以爲廉良者閣下信佞爲忠則
斯尚用矣信詐爲直則趙高用矣信貪虐爲廉良則蹠
躋者進隨夷者退矣又有某繡使拜寇而乞生某太守
望敵而先退閣下禮之爲好人養之爲大老則死節之
人少賣國之人來矣是非一謬黑白俱紊天下何自而

治乎及觀閣下左右參議贊密者未見其破切政柄規
進閣下於遠大之域者使閣下有可爲之時有可乘之
勢而詭無有成之效其故何也爲閣下計者少而爲身
謀者多也閣下身犯六畏釁隙多端不有內變必有外
禍不待智者而後知也閣下狃于小安而無長慮東南
豪傑又何望乎僕旣老且病爵祿不干于閣下惟以東
南切望于閣下幸采而行之毋陷羣小誤人之域則小
伯可以爲錢鏐大伯可以爲晉重耳齊小白也否則麋
鹿復上姑蘇臺始憶維禎之言於乎晚矣祗惡其切直
目爲狂生時四境日蹙朝廷方倚達實特穆爾爲保障

而納賄不已維禎上書諷之由是不合久之乃徙居松江

至正二十年春正月己丑朔察罕特穆爾請以鞏縣改

立軍州萬戶府招民屯種從之御史大夫魯達實舊

老的沙中丞耀珠舊奏今後各處從宜行事官員今改

毋得陰挾私讐明為舉索輒將風憲官吏擅自遷除侵

擾行事沮壞臺綱從之己亥夏煜自慶元還建康言

方國珍姦詐狀非兵威無以服之吳國公曰吾方致力

姑蘇未暇與校乃遣都事楊憲傅仲章往諭之曰及今

能滌心改過不負初心則三郡之地庶幾可保不然吾

恐汝兄弟敗亡妻子爲僇徒爲人所指笑也國珍不省

癸卯大寧路陷 乙卯會試舉人知貢舉平章政事

巴特瑪實哩

舊倫都麻失里今改

同知貢舉翰林學士承旨李好

文禮部尚書許從宗考試官國子祭酒張翥等言舊例

各處鄉試舉人三年一次取三百名會試取一百名今

歲鄉試所取比前數少止有八十八名會試三分內取

一分合取三十名請于三十名外添取五名從之 是

月張士誠破濠州遣其將李濟據之尋又破泗徐邳等

州 二月戊午朔中書左丞相泰費音罷爲太保俾養

疾于家御史臺言時事艱危正賴賢材宏濟泰費音以

師保兼相職爲宜帝不能從會陽翟王勒呼木特穆爾

舊倫阿魯輝帖木兒今改

倡亂騷動北邊勢逼上都皇太子乃言於

帝命泰費音留守上都實欲置之死地泰費音遂往有

同知太常院事托歡

舊倫脫歡今改

者泰費音子額森呼圖克

舊倫也先忽都今改

故將也聞陽翟王將至乃引兵縛王至軍前

泰費音不受令生致闕下北邊遂寧初努都爾噶臥病

謂人曰我疾固不起而泰費音亦不能久于位可歎也

至是其言乃驗

庚申福建行省參政袁天祿遣古田

縣尹林文廣以書納款于吳時義兵萬戶賽甫鼎阿里

密鼎據泉州陳友諒兵入杉關攻邵武汀州延平諸郡

縣羣盜乘勢竊發閩地騷動天祿知國勢不振故遣文
廣由海道來納款而福清州同知張希伯亦遣人請降
吳國公皆厚賞之遣還招諭 是月吳將徐達克高郵
尋復失之 三月戊子朔田豐陷保定路 慧見東方
吳改淮海翼爲江南等處分樞密院以繆大亨同僉
院事總制軍民大亨有治才寬厚不撓多惠愛及人至
于禁戢暴強剖折獄訟皆當其情民皆悅之 甲午廷
試進士三十五人賜邁珠魏元禮等及第出身有差
乙巳冀寧路陷 壬子復拜遼陽行省左丞相綽斯戡
爲中書右丞相時帝益厭政而宦者保布哈乘間用事

爲奸利綽斯戢因與結構相表裏四方警報及將臣功
狀皆壅不上聞 是月吳徵青田劉基龍泉章溢麗水
葉瑛金華宋濂至建康初吳國公至婺州召見濂及克
處州胡大海薦基等四人卽遣使以書幣徵之時總制
孫炎先奉命聘基使者再往反不起炎爲書數千言陳
天命以諭基基乃與三人者同至入見吳國公甚喜賜
坐勞之曰我爲天下屈四先生今天下分爭何時定乎
濂對曰天道無常惟德是輔不嗜殺人者能一之公稱
善基陳時務十八事且言明公因天下之亂崛起草昧
間咫尺一民無所憑僭名號甚尤明行事甚順應此王

師也我有兩敵陳友諒居西張士誠居東友諒包饒信
跨荆襄幾天下半而士誠僅有邊海地南不過會稽北
不過淮揚首鼠竄伏陰欲背元陽則附之此守虜耳無
能爲也友諒劫君而脅其下下皆乖怨性剽悍輕死不
難以其國嘗人之鋒然實數戰民疲下乖則不驩民疲
則不傅故漢易取也夫攫獸先猛擒賊先強今日之計
莫若先伐漢漢地廣大得漢天下之形成矣吳國公大
悅曰先生有至計毋惜盡言於是設禮賢館以處基等
寵禮甚至吳國公嘗問郎中陶安曰此四人者於汝何
如安曰臣謀略不如基學問不如濂治民之才不如溫

瑛公然之復多其能讓攷異劉基行狀云公與魯道元

有異雲起西北二人以為慶雲將賦詩公大言曰天子

氣也應在金陵十年後英主出我當輔之此說為明人

所盛傳朱檢討彝尊靜志居詩話辨其事曰劉誠意在

元時有和王文明絕句云夜涼月白西湖水坐看三台

上將星好事者遂傳會之謂公望西湖雲氣謂坐客云

後十年有帝者起吾當輔之此爰也當公驛管紹興時

感憤至欲自殷門人錫里質抱持之得不死明初既定

婺州猶佐舒穆魯伊遜拒守是豈預自負身為佐命者

耶以元明間事合考之朱說得其吳國公召常遇春

實矣今參用遜志齋集孫炎傳

于杭州遇春之出師也吳國公戒之曰克敵在勇全勝

在謀咎關羽號萬人敵為呂蒙所破為無謀也爾宜淡

戒之及攻杭州戰數不利故召還 夏四月庚申命大

司農司都事樂元臣招諭田豐至其軍為豐所害 辛

未僉行樞密院事張居敬復興中州 五月丁亥朔日
有食之雨雹 乙未陳友諒將羅忠顯陷辰州 是月
張士誠海運糧十一萬石至京師由是方面之權悉歸
士誠丞相達實特穆爾尸位而已 陳友諒兵攻池州
吳將徐達等擊敗之初友諒旣殺趙普勝卽有窺池州
之意吳國公察知之遣使謂達與常遇春曰友諒兵且
暮且至爾當以五千人守城遣萬人伏九華山下俟彼
兵臨城城上揚旗鳴鼓發伏兵往絕其後破之必矣至
是友諒兵果至其鋒甚銳直造城下城上揚旗鳴鼓伏
兵悉起緣山而出循江而下絕其歸路城中出兵夾擊

大破之斬首萬餘級生擒三千餘人遇春曰此皆勦敵
不殺爲後患達不可以狀聞吳國公遣使諭諸將釋之
而遇春先以夜阮殺之止存三百人吳國公聞之不憚
命悉放還 閏月丙辰朔陳友諒率舟師攻太平守將
樞密院判花雲與朱文遜等以兵三千拒戰文遜死之
友諒攻城三日不得入乃引巨舟迫城西南士卒緣舟
尾攀堞而登城遂陷雲被執縛急怒罵曰賊奴爾縛吾
吾主必滅爾斯爾爲膾也遂奮躍大呼而起縛皆絕奪
守者刀連斫五六人賊怒縛雲于舟檣叢射之雲至死
罵賊不絕口院判王鼎知府許瑗俱爲友諒所執亦抗

罵不屈皆死之雲自濠州隸麾下每戰輒立奇功因命
宿衛常在左右至是出守太平遂死于難年三十九妻
邵氏一子煒生始三歲戰方急邵氏會家人抱兒拜家
廟泣謂家人曰城且破吾夫必死夫死吾寧獨生然花
氏惟此一兒爲我善護之雲被執邵氏赴水死文遜吳
國公養子也瑗饒州樂平人鼎初爲院判儀真趙忠養
子襲忠職守太平尋復姓王氏至是與雲竝死于難

戊午陳友諒殺其主徐壽輝而自立友諒之攻太平也
挾壽輝以行及太平旣陷急謀僭竊乃于采石舟中使
人詣壽輝前佯爲白事令壯士持鐵鎚自後擊之碎其

首壽輝死友諒遂以采石五通廟爲行殿稱皇帝國號
漢改元大義仍以鄒普勝爲太師張必先爲丞相張定
邇爲太尉羣下立江岸草次行禮值大雨至冠服皆濡
濕略無儀節（攷異）友諒殺主在太平陷後元史順帝紀以其事繫五月丁亥朔日食之下誤也今從明史太祖紀
及陳友諒傳 庚申陳友諒遣人約張士誠同侵建

康士誠未報友諒自采石引舟師東下建康大震獻計
者或謀以城降或以鍾山有王氣欲奔據之或言決死
一戰戰不勝走未晚也獨劉基張目不言吳國公心非
諸將議召基入內問計基曰先斬主降及奔鍾山者公
曰先生計安出基曰天道後舉者勝吾以逸待勞何患

不克明公若傾府庫以開士怒至誠以固人心伏兵伺隙擊之取威制勝以成王業在此舉也公意益決或議先復太平以牽制之公曰不可太平吾新築壘濠塹浹固陸攻必不破彼以巨艦乘城故陷今彼據上游舟師十倍於我猝難復也或勸自將迎擊公曰不可敵知我出以偏師綴我而以舟師順流趨建康半日可達吾步騎亟引還已窮日矣百里趨戰兵法所忌非良策也乃馳諭胡大海以兵擣信州以牽其後而召指揮康茂才諭之曰有事命汝能之乎茂才曰惟命公曰汝舊與友諒游今友諒入寇吾欲逃其來非汝不可汝今佯書偽

降約爲內應且招之速來給告以虛實使分兵三道以弱其勢茂才曰諾家有老閹舊嘗事友諒使齋書往必信公以語李善長善長曰方憂寇來何更速之公曰二寇合吾何以支惟速其來而先破之則士誠膽落矣閹者至友諒軍友諒得書甚喜問康公今何在閹者曰見守江東橋又問橋何如曰木橋也乃與酒食遣還謂曰歸語康公吾即至至則呼老康爲驗閹者諾歸具以告公喜曰賊入吾彀中矣乃命善長夜撤江東橋易以鐵石比旦橋成有富民自友諒軍中逸歸者言友諒問新河口道路即令張德勝跨新河築虎口城以守之命馮

國勝常遇春率帳前五翼軍三萬人伏石灰山側徐達等陳兵南門外楊璟駐兵大勝港張德勝朱虎率舟師出龍江關外公總大軍屯盧龍山令持幟者偃黃幟于山之左偃赤幟于山之右戒曰寇至則舉赤幟舉黃幟則伏兵皆起各嚴師以待乙丑友諒舟師至大勝港楊璟整兵禦之港狹僅容二舟入友諒以舟不得並進遽引退出大江徑衝江東橋見橋皆鐵石乃驚疑連呼老康無應者知見給卽與其弟友仁率舟千餘向龍灣先遣萬人登岸立柵勢甚銳時酷暑公衣紫茸甲張蓋督兵見士卒流汗命去蓋猗欲戰公曰天將雨諸軍且就

倉當乘雨擊之時天無雲人莫之信忽雲起東北須臾雨大注赤幟舉下令拔柵諸軍競前拔柵友諒麾其軍來爭戰方合而雨止命發鼓鼓大震黃幟舉國勝遇春伏兵起達兵亦至德勝虎舟師竝集內外合擊友諒軍披靡不能支遂大潰兵走登舟值潮退舟膠淺猝不能動殺溺死無算俘其卒二萬餘其將張志雄梁鉉喻興劉世衍等皆降獲巨艦百餘艘友諒乘別舸脫走得茂才書於其所棄舟臥席下公笑曰彼愚至此可嗤也志雄本趙普勝部將善戰號長張嘗怨友諒殺普勝故龍灣之戰無鬪志及降言于公曰友諒之東下盡撤安慶

兵以從今之降卒皆安慶之兵友諒旣敗走安慶無守禦者公乃遣達國勝德勝等追友諒又命元帥余某等取安慶德勝追及友諒于慈湖縱火焚其舟至采石復戰德勝死國勝以五翼軍蹴之友諒與張定邊出阜旗軍迎戰又敗之友諒晝夜不得息遂棄太平遁去達追至池州而還余某遂取安慶守之友諒還至江州據以爲都德勝廬州梁縣人也 戊寅吳兵取信州路初吳國公命胡大海搗信州大海遣元帥葛俊率兵往道過衢州都事王愷止俊乘驛至金華謂大海曰廣信爲友諒門戶彼旣傾國入寇寧不以重兵爲守非大將統全

軍以臨之不可今偏師嘗敵設若挫衄非獨廣信不可
下吾衢先驛騷矣大海然之乃親率兵攻信州至靈溪
城中步騎數千出迎戰大海擊敗之督兵攻城守者不
能禦眾潰遂克之先是招安郡縣將士皆徵糧于民名
之曰寨糧民甚病焉大海以聞公亟命罷之吳置儒
學提舉司以宋濂爲提舉吳國公命長子標從受經學
濂首以文學受知恒侍公左右嘗命講春秋左氏傳濂
進曰春秋乃孔子褒善貶惡之書苟能遵行則賞罰適
中天下可定也六月己丑命博囉特穆爾部將方托
克托守禦嵐興休德等州又詔今後察罕特穆爾與博

離特穆爾部將毋得互相越境侵犯所守地因而讐殺
方托克托不得出嵐興界察罕特穆爾亦不得侵其地
辛亥吳夏築太平城初太平城俯瞰姑溪故陳友諒
舟師得緣尾攀堞而登至是常遇春復太平乃移城去
姑溪二十餘步增置樓堞守禦遂固 婺州之失也舒
穆魯伊遜之母爲吳將所獲令其弟以書招伊遜伊遜
不至及破處州伊遜將數十騎出走至建寧聚兵欲圖
恢復而所至人心已散知事不可爲歎曰處州吾所守
也今吾勢窮無所往不如還處州死亦爲處州鬼耳遂
以兵攻慶元耿再成擊敗之伊遜眾潰走竹口欲還福

建道經桃花坑爲鄉兵所邀擊伊遜力戰死其部將李文彥收其屍孫炎以聞吳國公嘉其盡忠死事遣使祭之復州民所立生祠張士誠遣其將呂珍率舟師自太湖入漕渠港分兵三路攻長興吳守將耿炳文親率精兵擊賊之獲仗船艦甚眾